



REPUBLIKA E SHQIPËRISË

KOMISIONERI PËR TË DREJTËN E INFORMIMIT DHE MBROJTJEN E TË  
DHËNAVE PERSONALE  
DREJTORIA PËR MBROJTJEN E TË DHËNAVE PERSONALE

Nr. 1698/prot.  
3

Tiranë më 6.12.2018

VENDIM

Nr. 72, datë 6.12.2018

MBI

ZBATIMIN E LIGJIT PËR MBROJTJEN E TË DHËNAVE PERSONALE

Në mbështetje të neneve 29, 30 dhe 32 të Ligjit Nr. 9887 datë 10.03.2008 "*Për Mbrojtjen e të Dhënave Personale*", neneve 77-112 të Ligjit Nr. 44/2015 "*Kodi i Procedurave Administrative të Republikës së Shqipërisë*", Vendimit nr. 49/2017 të Kuvendit "*Për krijimin e mekanizmit për monitorimin sistematik të ndjekjes dhe zbatimit të rekomandimeve të institucioneve të pavarura kushtetuese dhe atyre të krijuara me ligj*" si dhe provave të administruara në ngarkim të kontrolluesit "*Bashkia Pogradec*",

KONSTATOVA SE:

Në zbatim të Urdhrit Nr. 293 datë 13.11.2018 të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë kontrolluesit "*Bashkia Pogradec*", me objekt:

- Verifikim i zbatimit të Rekomandimit Nr.11 datë 06.06.2016, Ligjit Nr. 9887 datë 10.03.2008 "*Për mbrojtjen e të dhënave personale*" dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit "*Bashkia Pogradec*".

Komisioneri për të Drejtën e Informimit dhe Mbrojtjen e të Dhënave Personale, pasi shqyrtoi relacionin e hetimit administrativ, procesverbalin e konstatimit dhe provat e administruara gjatë ushtrimit të hetimit pranë kontrolluesit "*Bashkia Pogradec*", konstaton se:

1. Kontrolluesi, ka publikuar një rubrikë të veçantë "*Politikat e Privatësisë*", në portalin <http://www.bashkiapogradec.al>, në zbatim të pikës së parë të Rekomandimit Nr.11/2016 të Komisionerit.
2. Kontrolluesi "*Bashkia Pogradec*", në zbatim të nenit 21 të ligjit, ka "*Njoftuar*" në vitin 2011 Zyrën e Komisionerit në lidhje me përpunimin e të dhënave personale. Për shkak të ndryshimeve organizative në kohë, mjeteve dhe mënyrave të përpunimit të të dhënave, të kategorive të të dhënave, qëllimeve të përpunimit etj., konkludohet se ky "*Njoftim*" duhet përditësuar.

Përditësimi i njoftimit është një nga detyrimet më të rëndësishme ligjore i cili në vështrim të nenit 21 të ligjit, duhet të kryhet kur kërkohet ndryshimi i gjendjes së njoftimit të përpunimit, sipas nenit 22 të këtij ligji.

3. Kontrolluesi, nuk ka hartuar rregullore "*Për mbrojtjen, përpunimin, ruajtjen dhe sigurinë e të dhënave personale*", në zbatim të pikës së tretë të Rekomandimit Nr.11/2016 të Komisionerit. Konstatimi përbën shkelje administrative të nenit 27 të Ligjit Nr.9887/2008 "*Për Mbrojtjen e të Dhënave Personale*", pika 2/1: "*Kontrolluesi është i detyruar të dokumentojë masat tekniko-organizative të përshtatura dhe të zbatuara për garantimin e mbrojtjes së të dhënave personale, në përputhje me ligjin dhe rregullore të tjera.*".

Duhet kuptuar drejt nga kontrolluesi rëndësia që ka hartimi i një rregulloreje të mirëfilltë për mbrojtjen e të dhënave personale, dhe përdorimi i saj nga nëpunësit e tij, si një akt bazë i cili ndërgjegjëson dhe detyron punonjësit për ruajtjen e konfidencialitetit, ruajtjen nga keqpërdorimi dhe mënyrën e administrimit të të dhënave personale.

Në përfundim të kontrollit administrativ, referuar provave dhe konstatimeve në vend, grupi i inspektimit ka hartuar procesverbalin e datës 16.11.2018, të cilin përfaqësuesi i kontrolluesit e ka nënshkruar me pretendimin: "*Nga Bashkia Pogradec, do të hartohet dhe miratohet Rregullorja për mbrojtjen e të dhënave personale*".

Në zbatim të neneve 87-89 të Ligjit Nr. 44/2015 "*Kodi i Procedurave Administrative të Republikës së Shqipërisë*", kontrolluesi "*Bashkia Pogradec*" është njoftuar të marrë pjesë në datën 26.11.2018 ora 11:30, në seancë dëgjimore pranë ambienteve të Zyrës së Komisionerit. Kontrolluesi është paraqitur në seancë dëgjimore dhe ka dokumentuar rikuperimin e shkeljeve të konstatuara, duke dorëzuar pranë Zyrës së Komisionerit një kopje të Rregullores "*Për mbrojtjen, përpunimin, ruajtjen dhe sigurinë e të dhënave personale*", të miratuar nga Kryetari i Bashkisë.

Si përfundim, shkelja e konstatuar gjatë ushtrimit të hetimit administrativ e cila konsiston në mungesën e rregullores specifike "*Për mbrojtjen, përpunimin, dhe ruajtjen e të dhënave personale*", në kuptim të nenit 39, pika 1, gërma "*dh*" të Ligjit Nr.9887/2008 "*Për Mbrojtjen e të Dhënave Personale*", përbën kundërvajtje administrative dhe sanksionohet me gjobë si më poshtë:

dh) "Kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10.000 deri në 150.000 lekë".

Në bazë të nenit 39/2 të Ligjit Nr. 9887/2008 "Për mbrojtjen e të dhënave personale", kundërvajtjet e mësipërme administrative, dënohen me dyfishin e gjobës së përcaktuar në pikën 1 të këtij neni.

Për zgjedhjen e masës së gjobës, Zyra e Komisionerit ka parasysh faktin se shkeljet e konstatuara janë serioze. Ato lidhen me garantimin e parimeve dhe përpunimin e ligjshëm të të dhënave personale.

### **PËR KËTO ARSYE:**

Në zbatim të neneve 21, 27, 29, 30, 39 pika 1 gërmat "b", "d" dhe "dh", si dhe nenet 40 dhe 41 të Ligjit Nr. 9887 datë 10.03.2008 "Për Mbrojtjen e të Dhënave Personale",

### **V E N D O S A:**

1. Dënimin e kontrolluesit "Bashkia Pogradec", me gjobë në vlerën 20.000 (njëzetmijë) lekë për shkelje të detyrimeve të përcaktuara në nenin 27 të Ligjit Nr.9887/2008 "Për Mbrojtjen e të Dhënave Personale".
2. Kontrolluesi "Bashkia Pogradec", në zbatim të neneve 21 dhe 22 të Ligjit Nr.9887/2008 "Për Mbrojtjen e të Dhënave Personale", të kryejë pranë Zyrës së Komisionerit përditësimin e "Njoftimit" në lidhje me kategoritë e subjekteve të të dhënave, kategoritë e të dhënave personale që përpunohen, qëllimet e përpunimit etj.
3. Kontrolluesi "Bashkia Pogradec", në zbatim të nenit 27 të Ligjit Nr.9887/2008 "Për Mbrojtjen e të Dhënave Personale", të përmirësojë rregulloren për "Mbledhjen, përpunimin, ruajtjen dhe sigurinë e të dhënave" në përputhje me veprimtarinë dhe strukturën organizative.
4. Kontrolluesi "Bashkia Pogradec", të ketë në vëmendje respektimin e kushteve dhe kriterëve të përcaktuara në nenet 5 dhe 6 të Ligjit Nr.9887/2008 "Për Mbrojtjen e të Dhënave Personale" dhe Udhëzimin nr. 39/2013 të Komisionerit "Për përpunimin e të dhënave personale në regjistrat publikë" gjatë administrimit dhe publikimit të të dhënave personale që përmbajnë Vendimet e Këshillit Bashkiak, listat e personave që përfitojnë ndihmë ekonomike, listat e nxënësve që marrin bursë, listat e pagesave për personat me aftësi të kufizuar dhe shërbimet e tjera që iu ofrohen qytetarëve.

5. Kontrolluesi "Bashkia Pogradec", të kryejë të gjitha detyrimet që burojnë nga ligji dhe nga pikat 2 dhe 3 të këtij vendimi, brenda një afati 30 ditor, duke vënë në dijeni Zyrën e Komisionerit për përmbushjen e tyre.
6. Gjoba arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij Vendimi. Me kalimin e afatit të ankimit, ky Vendim kthehet në titull ekzekutiv dhe ekzekutohet në mënyrë të detyrueshme nga Zyra e Përmbarimit.
7. Kundër këtij Vendimi mund të bëhet ankim në Gjykatën Administrative të Shkallës së Parë Tiranë, brenda 30 (tridhjetë) ditëve nga komunikimi i këtij Vendimi.

Ky vendim u shpall sot më 6.12.2018.

**KOMISIONERI**

**Besnik Dervishi**

